

LA USC DI LADINS - VENERDI' 3 LUGLIO 2020

TURISM

Nia più balon, ma rodes da strèda

L'Apt de Fascia à endrezà na scontrèda streaming per prejentèr l bilanz e la scomenzadives de l'istà 2020. La setemèna che vegn sun Sèn Pelegrin se arcedarà una de la squadres de ziclism che à vent de più ti ultimes egn

Descheche à cognù fèr duta la aziendes te chesta situazion de emergenza, ence l'Apt de Fascia à endrezà sia radunanza generèla travers la partezipazion demò del Raprejentant Designà, radunanza che é stata metuda sul calendèr en mercol ai 8 de messèl. Desche raprejentant l'è stat designà la Federazion Trentina de la Cooperazion te la persona de Gabriele Barichello.

Aboncont per meter en consaputa i sozi del bilanz e de la neva scomenzadives per l'istà 2020 e per i envièr se sà ben a dèr jù sia stima portan deretorn i papieres ti ofizies sul teritorie, en lunesc ai 22 de jugn l Consei de Aministrazion à endrezà



La Deceuninck Quick Step sarà sun Sèn Pelegrin dai 6 ai 23 de messèl.



Chest istà con la Guest Card i ghesc podarà se emprevaler di servijes e trasport.

na direta streaming sun YouTube. Dantfora l president Fausto Lorenz à volù recordèr Clara Nicolodi, mère de Walter Nicolodi, na persona che se à dat jù duta la vita tel ciamp del turism.

L'à dapò recordà i passajes più emportanc de la neva reforma del turism de l'assessor provinzièl Failoni che jirà en दौरa del 2022: l ghest cognarà semper esser al zenter de l'atenzion, la calità del teritorie e del paesaje l'è i elemenc fundamentèi ence per n turism internazionèl e per smaorèr l vadagn de noscia aziendes. «L'assessor Failoni à semper dit che demò le gran Apt podarà se tor dant le endesfide senestre di egn

che vegn – à sotlineà Lorenz – e noi no podon far condemanco de esser enjigné. Per chest jà del 2017 l'Apt à envià via n percors sun chesta strada, n projet inovatif, na neva strategia turistica col suport de TSM per portar la gestion de l'azienda tel davegnir.

Per aer maor resultat l'Apt à tout sù Nicolò Weiss con l'enciaria de ge star dò a la projetazion e a la comunicazion, el laora te n n nef ofize fat fora a Poza olache l'è stat metù ensema la neva area web con la comunicazion.»

L president Lorenz à dapò let jù l bilanz serà sù ai 31 de december del 2019 che veit amò n smaorament de utol per via de maor prejenzes e

donca de n maor retorn de la steora de sojornanza.

«L'autofinziament ne consent de restar a passa l 51% de contribuc privac e chest ne deida a lurar a na vida più asvelta e percanta» – à dit amò Lorenz.

L bilanz se sera sù con n arvanz de aministrazion de 57.526 euro. N bilanz de passa 6 milions de euro che à permetù de sostegnir n grum de ativitèdes e de investir te projec per l'oferta turistica. Del 2019 l'è stat endrezà i Mondieù Junior de schi e l Fassa Enduro World Series che à abù gran suzess de gra a l'empegn di responsaboi Davide Moser e William Basilico a chi che l president à volù ge sporjer amò n fort develpai. N muie l'è stat investi ence su la comunicazion e l marketing, su la promozion di marcé te la Tèlia e foravia e su l'endrez de meeting.

La neva Guest Card per servijes e trasport

L diretor Andrea Weiss à dapò metù dant la gran campagna de comunicazion e de promozion che l'è stat fat su la televizion e a la radio per testimonièr la voa de pontèr via endodanef dò l moment senester.

Chest istà no ruarà la squadra de balon de la Fiorentina a se arcedèr a Moena, ma dai 6 ai 23 de messèl sun Sèn Pelegrin sarà la Deceuninck Quick Step, la squadra de ziclism che ti ultimes egn à concostà più ventes con si atlec più cognosciui a nivel mondieùl.

Amò per chel che vèrda i investimenti vegnarà endrezà 12 conzerc de Panorama Music sa mont dai 12 de messèl ai 27 de aost, l projet de animazion Fassalandia, l Val de Fascia Bike Express (chest an demò per Fascia) con doi corses da doman

da Moena fin ta Dèlba e doi domesdi da Molina fin ta Dèlba.

N grop de lurier de l'Apt se à cruzià ence del coordinament per netèr e verjer i troes tel bosch col didament di Comuns, la Forestala, i impianc portamont e n muie de voluntadives che se à metù a la leta.

Na pèrt de la scontrèda é stata dedichèda a la spiegazion da man de Paolo Nascivera, diretor de l'area inovazion de Trentino Marketing, de la neva Card turistica che Fascia à tout sù ensema a etres atores de dut l Trentin. La Guest Card l'è na card che ge pemet al ghest de se emprevaler di servijes sul teritorie de duta la Provinzia e de durèr fin canche l vel l servije de trasport publich. Nascivera à spiegà che vegn spent percheche la card vegne data fora te sia forma digitèla per smendrèr i contac, per poder ge la consegnèr jà canche i prenota e per aer na mior comunicazion endèna la vacanza.

Dant de serèr sù ge é amò stat dat la parola a l'assessor provinzièl al turism Roberto Failoni che l'ha spiegà che l'è dò che l fèsc na raida fora per vèlch struttura alberghiera de dut l Trentin per veder coche vegn lurà aldò de la neva despozisions anti-Covid. L'à dit che se n'aer adat che l'è mingol de problemes con la gestion de buffet ma che l vardarà de fèr l possibil percheche i operatores turistics posse lurèr zenza gregn impedimenc. N ringraziament l'ha volù ge l sporjer al president Lorenz e a dut l Consei e i colaboradores per ge aer dedicà temp ai desvalives gropes de lurier te la fasa delicata tanche passèda per chierir de pontèr via endodanef con la neva sajon del turism che se anunzia belebon positiva.

Monica Cigolla